



## Conversion di bono di papel di Gobierno di Aruba den bono digital registra



Banco Central di Aruba (BCA), designa como e banco di emision di bono di Gobierno, ta informa lo siguiente.

Basa riba e Landsbesluit schatkistpapier (AB 1988 no. 6), manera revisa door di e Landsbesluit AB 2014 no. 64, BCA ta den e proceso di converti, na un manera voluntario, bononan fisico di Gobierno di Aruba den bononan digital registra na BCA. Door di e conversion aki, doñonan di bononan no mester warda nan bononan di papel mas y BCA lo transferi automaticamente e pago di e suma principal y interes riba e cuenta di banco di e doñonan di e bononan registra na BCA.

Den e cuadro aki, BCA ta invita tur doño di bononan di papel di Gobierno di Aruba cu ainda no a cuminsa cu e proceso pa converti esakinan den bononan digital registra, pa tuma contacto mas pronto cu ta posibel cu nan banco comercial. Pa autorisa e conversion, e doño di bononan di papel mester yena y firma e formulario di autorisacion na su respectivo banconan comercial. Despues, e banconan comercial mester entrega e formulario aki, hunto cu un copia di un ID valido di e doño di bononan di papel, na BCA pa cuminsa cu e proceso di conversion. Na momento cu BCA ricibi e documentonan aki, BCA den colaboracion estrecho cu e banconan comercial lo converti e bononan di papel di Gobierno di Aruba den bononan digital registra dentro di 1 siman. Asina cu e bononan ta converti y registra den e registro digital, e banconan comercial lo duna e doño di bononan un confirmacion di e conversion exitoso di e bononan aki.